

Xefe Suco Husi Lore - Lautem Keixa Soldadu Militar Australia

Contributed by Atay Alves
 Wednesday, 17 March 2010
 Last Updated Wednesday, 17 March 2010

CJITL flash, Forsa Australianu ne'be durante krizi 2006 to'agora hala'o misaun fo siguransa ba povu Timor Leste deskobre hala'o mos misaun politika iha rai laran.

Informasaun ne'be Centru Jornalista Investigativu Timor Leste (CJITL) deskobre liu husi komunikadu imprensa Organizasaun Non Governmental La'o Hamutuk katak iha Suco Lore I, Sub Dsitritu Lospalos, Distritu Lautem esplika katak Forsa Australianu no Nova Zelandia halo enkontru ho comunidade hodi husu konaba apoiu governu Xanana ka governu Fretilin.

Soldadu hirak ne'e halibur comunidade iha loron 23 Fulan Feveireiru, wainhira tun husi helicopter no husu comunidade atu foti liman karik sira prefere governu Aliansa Maioria Parlamentar (AMP) diak liu kompara ho governu Fretilin nian uluk.

Liu husi ONG La'o Hamutuk, Xefe Suco Lore, husu ba forsa Australiano sira atu labele interven direitu comunidade nian atu livre hala'o sira nia politika no labele obriga povu hodi publika sai sira nia esperasaun politika tanba ne'e bele estraga povu nia liberdade.

Nune'e mos tuir komunikadu ne'e katak iha, Timor Leste nu'udar nasaun demokrasia sempre garantia sidadaun nia direitu atu suporta partidu politiku ruma ne'be legal tuir sira nia hakarak.

Iha relatoriu krizi 2006 wainhira Soldadu Australia tama iha nasaun foun ida ne'e sempre fo presaun ba sidadaun Timor Leste hodi kontra lider individual ida ka grupo ida.

Xefe suku Lore I, Mateus Fernandes Sequiera liu husi karta rekomendasaun ho numeru 01/ADM/SL.I/III/2010 ne'be dirizi ba NGO La'o hamutuk katak nia rasik la konkorda ho atetude soldadu forsa Australia no Nova Zelandia sira ne'be husu ba nia comunidade atu foti liman hodi hili governu ne'be mak sira prefere. 'Hau nudar Xefe Suco ladun konkorda mak liafuan balun ne'be fo sai iha momentu ne'beba', dehan Xefe suco ne'e.

'Tanba sira husu ba comunidade katak governu anterior ho governu agora AMP agora ne'e ida ne'be mak diak liu no husu mos ba comunidade para aseita governu AMP ne'e foti liman'. Tuir lider komunitariu ne'e katak hahalok soldadu hirak ne'e atu kria instabilidade iha comunidade nia let tanba interven ema nia direitu atu livre hili partidu politiku ruma.

To'o notisia ne'e hatun ami sei tenta hela atu husu klarifikasaun husi parte komandu Forsa Stabilizasaun Internasional (FSI) iha Dili. (*Atay)